



Republika e Kosovës
Republika Kosova-Republic of Kosovo

Oda e infermierëve, mamive dhe profesionistëve tjerë shëndetësor të Kosovës
Komora medicinskih sestara, babica i ostalih zdravstvenih stručnjaka Kosova
The Kosovo Chamber of nurses, midwives and other health professionals



**KODI ETIK DHE DEONTOLOGJISË I ANËTARËVE TË
ODËS SË INFERMIERËVE, MAMIVE DHE PROFESIONISTËVE
TJERË SHËNDETËSORË TË KOSOVËS**

Prishtinë, 2025

KUVENDI I ODËS SË INFERMIERËVE TE KOSOVËS, në mbështetje të Nenit 9, paragrafit 1 me nën-paragrafin 1.1 dhe Nenin 19, paragrafin 1 me nën-paragrafin 1.2 të Ligjit Nr. 04/L-150 për Odat e Profesionistëve Shëndetësorë; Nenin 14, paragrafin 1 me nën-paragrafin 1.1 dhe Nenin 19, paragrafin 1 me nën-paragrafin 1.2 të Statutit të Odës, në mbledhjen e rregullt të datës 27.02.2025, miraton:

KODIN E ETIKËS DHE DEONTOLOGJISË I ANËTARËVE TË OIK

I. DISPOZITAT E PËRGJITHSHME

Qëllimi

Neni 1

Kodi i Etikës dhe Deontologjisë i Infermierëve dhe profesionistëve tjerë shëndetësor në tekstin e mëtejme: Kodi përcakton parimet, rregullat, standardin e sjelljes profesionale dhe etikën, të cilat anëtarët e Odës së Infermierëve të Kosovës (në tekstin e mëtejme: Oda) janë të detyruar t'i përmbahen. Dispozitat e këtij kodi kanë për qëllim të ruajë lirinë dhe reputacionin e profesionit shëndetësor të anëtarëve të Odës, të ngritë cilësinë e shërbimeve shëndetësore dhe të forcojë besimin midis infermiereve dhe pacientëve, besimin ndërkolegial të infermierëve, besimin e infermierëve me profesionistët shëndetësor dhe me publikun, duke respektuar, betimin e hipokratit dhe infermierit, të drejtat themelore të njeriut, konceptin e autonomisë profesionale dhe të drejtave të pacientit të parapara sipas legjislacionit në fuqi.

Fushëveprimi

Neni 2

Dispozitat e kodit etik janë të detyrueshme për të gjithë anëtarët e Odës, pa marrë parasysh pozitën e tyre në institucionet publike apo private. Veprimi në kundërshtim me dispozitat e këtij kodi, është e sanksionuar komfor Ligjit për Odat e Profesionistëve Shëndetësor

Termet

Neni 3

Termet e përdorur në Kod, e që kanë një kuptim gjinor, pavarësisht nëse përdoren në gjininë mashkullore apo femërore, përfshijnë gjininë mashkullore dhe femërore në mënyrë të barabartë.

Odë – Oda e Infermierëve, Mamive dhe Profesionistëve tjerë shëndetësorë të Kosovës

Anëtarë – nënkupton të gjitha profilet të cilat janë të obliguara të anëtarësohen në kuadër të Odës.

Privatësia dhe konfidencialiteti - përfshin të gjitha informacionet që ka Anëtari gjatë kryerjes së profesionit, për pacientin, rrethanat personale, familjare dhe shoqërore, si dhe informacionin lidhur me zbulimin, trajtimin dhe shërimin e sëmundjes

Njohja e legjislacionit

Neni 4

1. Çdo anëtar duhet të njohë dhe respekton legjislacionin në fushën e shëndetësisë nga fushëveprimi i profilit, Statutin, Kodin Etik dhe aktet tjera normative të Odës.

2. Aplikimi për anëtarësim në Odë, nënkupton deklarin e tij për njohurinë mbi përmbajtjen e obligimeve etike të anëtarit të Odës.
3. Deklarata nën betim për njohjen e Kodit Etik si dhe të kaluarën etike, bashkëngjitet në shtojcën e këtij Kodi dhe validohet në sistemin elektronik.

II. PARIMET THEMELORE

Parimi i ndërgjegjshmërisë

Neni 5

Anëtari është i detyruar të kryejë veprimtarinë e tij profesionale me ndërgjegje, sipas rregullave të profesionit shëndetësor dhe me kujdesin e nevojshëm, në përputhje me parimet e kodit etik si dhe me standardet vendore dhe ndërkombëtare të të drejtave të njeriut.

Parimi i barazisë

Neni 6

Anëtari ofron kujdesin shëndetësor në mënyrë të barabartë për të gjithë pavarësisht nga mosha, gjinia, raca, kombësia, religjioni ose opinioni politik dhe statusi shoqëror, gjuha, kultura, lloji i sëmundjes, paaftësia mendore ose fizike ose tipare të tjera personale, duke respektuar të drejtat dhe dinjitetin e njeriut.

Parimi i respektimit të autonomisë dhe të drejtave të pacientëve

Neni 7

Anëtari është i detyruar të respektojë të drejtat, liritë, autonominë dhe dinjitetin njerëzor të secilit pacient, si dhe të udhëhiqet në punën e tij nga parimet e bamirësisë dhe parimet e drejtësisë.

Parimi i ruajtjes së integritetit profesional

Neni 8

1. Anëtari është i detyruar të ruajë integritetin dhe dinjitetin profesional.
2. Anëtari është i detyruar të ruajë me të gjitha aftësitë e tij traditën fisnike të profesionit shëndetësor të profileve, duke ruajtur standarde të larta të punës profesionale dhe sjelljes etike ndaj pacientit dhe të afërmeve të tij, si dhe ndaj shoqërisë dhe publikut në përgjithësi.

III. DETYRAT THEMELORE

Neni 9

Anëtari me profesionin e tij shëndetësor i përkushtohet shëndetit publik dhe të përgjithshëm të njeriut, duke i'u përmbajtur standardeve të shkencës mjekësore dhe parimeve etike.

Përgatitja profesionale

Neni 10

Anëtari duhet të jetë i vetëdijshëm për përgatitjen, kompetencat dhe kufizimet profesionale të tij, dhe të gjitha veprimet e tij duhet ti marrë komfor këtyre përgatitjeve dhe kompetencave

profesionale.

Edukimi i vazhdueshëm profesional

Neni 11

1. Anëtari duhet të jetë i përkushtuar për zhvillimin dhe përparimin e profesionit dhe të kujdeset për edukimin e vazhdueshëm profesional.
2. Njohuritë e fituara profesionale duhet t'i përcjell te kolegët dhe profesionistët tjerë shëndetësorë.

Zbatimi i protokolleve të shërbimit

Neni 12

Anëtari gjatë ofrimit të shërbimeve shëndetësore brenda kompetencës profesionale ka për obligim të zbatoj protokollin përkatës të shërbimit i cili është në zbatim

Administrimi i terapisë

Neni 13

1. Anëtari kryen administrim të barnave dhe terapisë tek pacienti, në parim, vetëm me përshkrimin mjekësorë.
2. Anëtari është i detyruar ta informojë pacientin për pasojat për shëndetin e tij në rast të refuzimit të trajtimit me barnat e rekomanduara nga mjeku përgjegjës.

Ndihma urgjente

Neni 14

1. Anëtari është i detyruar të ofrojë ndihmë mjekësore urgjente, në përputhje me kualifikimin e tij profesional
2. Puna në rast të rrethanave të jashtëzakonshme është një detyrim i veçantë për një anëtarë.
3. Anëtari duhet të njohë parimet moderne të doktrinës së punës në rrethana të jashtëzakonshme.

Situatat emergjente

Neni 15

Anëtari në situata emergjente është i detyruar ti përgjigjet çdo ftese të autoriteteve shtetërore për tejkalimin e situatës emergjente.

Respekti

Neni 16

Anëtari duhet t'i respektojë të drejtat e pacientit, kolegëve dhe punëtorëve tjerë shëndetësorë si dhe rregullat e institucioneve shëndetësore.

Sinjalizimi i kolegut

Neni 17

1. Anëtari në çdo rast që vlerëson apo informohet se kolegu i tij abuzon me detyrat dhe përgjegjësitë e tij, duhet të sinjalizoj tek organet kompetente të Odës.
2. Oda siguron dhe mbanë përgjegjësinë për konfidencialitetin e sinjalizuesit.
3. Në rast të sinjalizimit të motivuar nga arsyet personale me tendencë abuzuese, denigruese për anëtarët tjerë të Odës, i njëjti do të përgjigjet në bazë të rregullave dhe ligjeve në fuqi.

Transparenca e punës në poste publike dhe mos abuzimi

Neni 18

1. Anëtarit në asnjë rast nuk i lejohe të abuzojë me privilegjet që i krijon statusi i tij profesional ndaj të sëmurit, kolegëve për qëllime përfitimi personal, material dhe jo material, apo çfarëdo forme tjetër të përfitimit.
2. Anëtari që kryen funksione administrative, apo i zgjedhur në poste publike, duhet të sigurojë transparencën më të lartë për gjithçka, që mund të duket si konflikt interesi në raport me shërbimin shëndetësor. Ai e ka të ndaluar të shfrytëzojë funksionin dhe postin e tij për përfitime të tjera personale të kundërligjshme.
3. Anëtari, madje edhe jashtë ushtrimit të detyrës duhet shmangur çdo akt që do të zhvlerësonte personalitetin dhe dinjitetin e tij profesional.

Privatësia dhe konfidencialiteti - sekreti profesional

Neni 19

1. Anëtari është i detyruar të mbajë fshehtësinë profesionale për pacientin dhe për anëtarët e familjes së pacientit, edhe pas vdekjes së tij.
2. Anëtari duhet të ruaj fshehtësinë profesionale për atë që ka rrëfyer pacienti edhe në rast kur ftohet në cilësinë e dëshmitarit nga autoritetet përkatëse, përveç nëse është e paraparë ndryshe me ligj.
3. I gjithë dokumentacioni mjekësor i pacientit është i natyrës konfidenciale dhe askush nuk ka të drejtë çasje në këto dokumente, përjashtimisht rasteve të parapara me ligj.

Privatësia në raport me subjektet

Neni 20

1. Anëtari obligohet të ruajë të dhënat personale dhe shëndetësore të pacientit apo subjekteve tjera.
2. Ai është i detyruar të kujdeset që fshehtësia profesionale të ruhet edhe prej personave të tjerë që punojnë me të.

Qasja në dokumentacion mjekësor

Neni 21

1. Anëtari i Odës duhet të mundësojë qasjen në dokumentacionin mjekësor nëse pacienti e kërkon këtë dhe me rregullin e brendshëm të institucionit nuk është caktuar përgjegjës tjetër.
2. Anëtari i Odës nuk duhet të përmendë emrin e pacientit në publik në mënyrë të tillë që të mos rrezikohet privatësia e pacientit.
3. Anëtari nuk mund të jap informata jashtë kompetencës profesionale.

Zbulimi i fshehtësisë

Neni 22

Zbulimi i fshehtësive profesionale lejohet vetëm me pëlqimin e pacientit dhe nëse është në dobi të pacientit dhe familjes së tij ose interesit publik, si dhe nëse kërkohet nga organi kompetentë i njohur me ligj, në përputhje me procedurat ligjore

Privatësia gjatë hulumtimeve

Neni 23

1. Të dhënat mbi rezultatet e hulumtimit mund të përdoren në studimet e kërkimit shkencor, por vetëm në një mënyrë që siguron anonimitetin e pacientit dhe dinjitetin e pacientit.
2. Publikimi i të dhënave të pacientit me qëllim të hulumtimit shkencor dhe profesional është i mundur vetëm me pëlqimin e pacientit.

IV.RAPORTET ME PACIENTIN

Mos shfrytëzimi emocional, fizik dhe material

Neni 24

Anëtari i Odës duhet ta kryej punën e tij në mënyrë profesionale dhe etike, pa e shfrytëzuar pacientin në aspektin emocional, fizik apo material.

Parimi i ndershmërisë, besimit dhe respektit

Neni 25

1. Anëtari i Odës e bazon marrëdhënien e tij me pacientët dhe shoqëruesit e tyre mbi parimet e ndershmërisë, besimit dhe respektit.
2. Ata duhet të ruajnë gjithmonë dhe në çdo kohë kufijtë profesional në marrëdhëniet me pacientin. Anëtari duhet të sigurojë që të gjitha aspektet e marrëdhënies janë të lidhura vetëm në raporte profesionale me nevojat e pacientëve.
3. Sjellja korrekte brenda normave dhe rregullave të detyrës, komunikimi me qetësi, me siguri dhe brenda kompetencave të caktuara me pacientin dhe familjarët përbën një aspekt tjetër etik të anëtarëve . Shkelja apo tejkalim i këtyre normave është i dënueshëm

Prania e familjarëve

Neni 26

Të afërmit e pacientëve apo persona të tjerë mund të jenë të pranishëm gjatë dhënies së shërbimit nëse këtë e lejon pacienti, kushtet dhe mundësitë profesionale, nën kushtet e përcaktuara nga institucioni shëndetësor.

Kolegialiteti dhe referimi

Neni 27

1. Anëtari komunikon me kolegët apo profesionistët tjerë shëndetësor në rastet kur identifikon problem të mundshëm që do të cenonte trajtimin apo kujdesin e suksesshëm

shëndetësor të pacientit.

2. Ndalohet çdo implikim i anëtarit të Odës në referim të pacientëve.

Përshpejtimi i vdekjes dhe trajtimi

Neni 28

1. Anëtari është i detyruar të jetë i besueshëm dhe i sinqertë me pacientët e tij, duke parandaluar pritjet joreale të pacientit pas përfundimit të trajtimit.
2. Anëtari kujdeset për pacientin, cilado qofshin kushtet e tij klinike, edhe në fund të jetës, duke njohur rëndësinë e inkurajimit ambjental, fizik, ekologjik, shpirtëror.
3. Anëtari nuk merr pjesë në trajtimet e fundit për shpejtimin e vdekjes të të asistuarit (pacientit) edhe në rastet kur kërkesa vjen nga i interesuari apo nga familjarët.
4. Anëtari mbështet familjarët e pacientit në veçanti, në momentin e humbjes së jetës dhe më pas. Në mungesë të tyre, ata janë të detyruar të zhveshin, shtrijnë, rregullojnë fytyrën dhe shoqërojnë në trupin në morg.

Përfitimi financiar

Neni 29

Përveç shpërblimit të rregullt për punën profesionale, në formën e pagës ose honorarit, një tjetër përfitim material ose ndonjë përfitim tjetër nga puna e tij mjekësore, si dhe kushtëzimi i ofrimit të një shërbimi shëndetësor me një dhuratë e definuar sipas legjislacionit në fuqi është në kundërshtim me këtë Kod, me përjashtim të veprimtarive të akredituara të Edukimit të Vazhdueshëm Profesional.

V. RAPORTET NDËRKOLEGIALE

Solidariteti me kolegët

Neni 30

1. Çdo anëtarë , e ka për detyrë të ruajë dhe respektojë solidaritetin me kolegët, në të mirë të ruajtjes së integritetit profesional dhe në respekt të normave të etikës, duke marrë parasysh edhe emantinë e ndërsjelltë
2. Në rastet e konfliktit të shkaktuara nga ndryshimet e thella etike, anëtari angazhohet për të gjetur zgjidhjen e duhur, përmes dialogut, vullnetit të mirë me parimet etike dhe me ndërgjegjen profesionale, e në rast nevojë edhe me ndërmjetësinë e autoriteteve institucionale apo organeve të Odës.
3. Anëtarit të Odës nuk i lejohe të diskutojë për lëshimet profesionale të kolegeve me pacientin, me familjarët, apo me kolegë dhe persona të tjerë.

Mbrojtja e kolegëve

Neni 31

1. Anëtari i Odës do të mbrojë kolegët e vet, të cilët janë fajësuar në mënyrë të pabazë, sipas parimeve të kolegialitetit.
2. Nëse këto parregullsi nuk korrigjohen, atëherë ai do t'u drejtohet organeve përkatëse në Odë.

3. Bashkëpunimi me anëtarë të profesioneve të tjera shëndetësore lejohet, nëse fushat e përgjegjësive së anëtarit të Odës dhe anëtarit të profesionit tjetër shëndetësor mbahen qartë të ndara nga njëra-tjetra.

VI. RAPORTET E ANËTARËVE ME ODËN

Obligimet e anëtarit

Neni 32

1. Anëtari është i detyruar t'i përmbushë obligimet që i ka ndaj Odës, të respektojë, të ruajë reputacionin, si dhe të kontribuojë në punën më të suksesshme të Odës.
2. Pakënaqësitë eventuale mbi punën apo vendimmarrjen e organeve të Odës dhe shërbimit profesional të Odës adresohen në organet kompetente brenda Odës.

Gjykimi disiplinor

Neni 33

Pavarësisht institucionit publik apo privat në të cilin punon, si dhe pozicionit hierarkik në institucionin të cilit i përket, anëtari është i detyruar t'i përgjigjet çdo kërkesë nga Oda, për t'u paraqitur për një proces gjykimi disiplinor profesional, apo çfarëdo informacioni, a bashkëpunimi që i kërkohet nga Oda.

Efektet e vendimeve të Kuvendit

Neni 34

1. Vendimet e Kuvendit të Odës janë obligative për të gjithë anëtarët e Odës. Të njëjtat janë përfundimtare në procedurën e brendshme administrative dhe mund të atakohen vetëm në rrugë gjyqësore.
2. Anëtarët e organeve të Odës, të cilët gjatë ushtrimit të funksionit të tyre nuk veprojnë në përputhje me aktet normative materiale në fuqi, i nënshtrohen përgjegjësisë disiplinore në organet etike të Odës.

Obligimet e konfidencialitetit për anëtarët e organeve

Neni 35

Anëtarët e organeve të Odës obligohen të ruajnë konfidencialitetin e të dhënave në përputhje me rregulloren e veçantë të Këshillit Drejtues për konfidencialitetin.

VII. RAPORTET E INFERMIERËVE ME PUBLIKUN

Raporti i anëtarit me publikun

Neni 36

1. Anëtari i Odës si anëtarë i një profesioni të privilegjuar, fisnik dhe human, duhet të punoj dhe veprojë duke u kujdesur në atë mënyrë që të sigurojë besimin e pacientit dhe publikun për profesionin e infermierit dhe profileve tjera anëtare të Odës.
2. Anëtari nuk do të përdorë pozitën e tij profesionale me qëllim të shfrytëzimit të mungesës së njohurive të tjerëve,

3. Anëtari duhet të jetë i vetëdijshëm për natyrën sociale të profesionit të tij, prandaj masat shëndetësore duhet të mbështeten dhe promovohen për të përmirësuar shëndetin e përgjithshëm të popullatës
4. Anëtari ruan emrin dhe figurën morale, duke qëndruar larg veseve që i dëmtojnë si: alkooli, droga, imoraliteti. Rastet e shthurjes morale, paraqitjes në punë në gjendje të dehur apo nën efektin e substancave të jashtëligjshme, ndëshkohen.

Përdorimi i titujve profesional, shkencor apo akademik

Neni 37

Anëtari nuk mund të përdorë një titull profesional, shkencor apo akademik, që nuk është fituar në përputhje me rregulloret përkatëse ligjore.

Kodi i veshjes

Neni 38

1. Profesionisti shëndetësorë gjatë ushtrimit të veprimtarisë së tij, duhet ti përmbahet këtij kodi të veshjes:
 1. veshje të pastra, pa njolla, pa vrima ose grisje, të mbajtur në gjendje të mirë, dhe në përputhje me përmasat trupore;
 2. veshje që nuk kanë fotografi, mbishkrime, shkëlqim, xixa, dekoltetë e theksuara,
 3. bluzat me rripa, bluzat që zbulojnë barkun, funde që nuk kalojnë sipër gjurit
 4. funde pa hapje ose prerje, pantallonat e shkurtra me gjatësi nën gjunjë,
 5. veshje sportive, veshje me mesazh vulgariteti;
 6. veshjet duhet të mos jenë transparente dhe të zbulojnë të brendshmet, rripat apo dantellat;
 7. ndalohen kapelat (përveç rasteve të veçanta që lidhen me aspektin shëndetësor),
 8. syzet e diellit, dhe aksesorë të ngjashëm në ambientet e punës;
 9. ndalohen kufjet gjatë komunikimit direkt me palët dhe stafin gjatë orarit të punës;
 10. ndalohen të gjitha llojet piercing në pjesët e dukshme të fytyrës dhe trupit, përveç vathëve të zakonshëm me madhësi normale;
 11. aksesorët të mos jenë tepër të mëdhenj, me ngjyra ose forma të ekzagjeruara, apo me shenja diskriminuese;
 12. ndalohen sandalet, shapkët, dhe ecja zbathur në ambientet e punës;
 13. mustaqet, zylyfet, llojet e ndryshme të mjekrave, të jenë të pastra dhe të prera mirë;
 14. grimi natyral;
 15. thonjtë të jenë të pastër dhe me madhësi normale;
 16. Flokët veçanërisht në rastet kur janë të gjatë duhet të jenë të lidhura për të shmangur çdo pengesë gjatë punës dhe për të ruajtur higjienën në mjediset e kujdesit shëndetësor. Flokët të jenë të mirëmbajtur, dhe të mos jenë të ngjyrosur me ngjyra ekstravagante;
 17. Çdo tatuazh ose shenjë e dukshme që mund të jetë irrituese për pacientët duhet të mbulohet për të ruajtur një pamje profesionale.
2. Shërbimet administrative të OIK të kërkuara nga ana e anëtarit me paraqitje në kundërshtim me dispozitat e këtij neni, refuzohen deri në respektimin e këtij neni.

Përdorimi i uniformës shëndetësore

Neni 39

1. Dalja jashtë institucionit shëndetësorë me uniformën e punës për qëllime jo të lidhura me profesionin është e dënueshme.
2. Profesionistët e sallave të operacionit, reanimacionit dhe të gjithë kabineteve ku kërkohet sterilitet i veçantë duhet të përdorin uniforma përkatëse. Dalja jashtë ambientit të punës ul dinjitetin e tyre dhe rrit rreziqet për pacientin, dhe përbën një veprim të dënueshëm

VIII. REKLAMIMI I SHËRBIMEVE TË ANËTARËVE TË OIK

Aktivitetet reklamuese dhe favorizuese

Neni 40

Anëtari duhet ti shmangët çdo situatë që bie ndesh me parandalimin e konfliktit të interesit gjatë ofrimit të shërbimeve shëndetësore. Është i ndaluar çdo aktivitet referues, reklamues apo favorizues që ndërlidhet me interesa të drejtpërdrejta materiale apo interesa tjera personale, duke përfshirë edhe produktet farmaceutike.

Fotografia e pacientit

Neni 41

Përdorimi i fotografive të pacientit përmes internetit lejohet vetëm me pëlqimin me shkrim të pacientit dhe pa zbuluar identitetin e pacientit.

Promovimi i aktiviteteve të odës

Neni 42

1. Promovimi i aktiviteteve të Odës bëhet vetëm nga personi i autorizuar, apo me lejen e personit të autorizuar nga Oda.
2. Anëtari i Odës kufizohet nga publikimet në rrjetet sociale të aktiviteteve që bien ndesh me kodin e etikës dhe me misionin e odës.
3. Anëtari i Odës, i cili në mënyrë direkte apo tërthorët lidhet me funksionin apo autoritetet e odës, kufizohet nga etiketimet dhe linçimet, përdorimin e fjalorit të pa përshtatshëm që i referohen personave fizik apo juridik dhe bartësve të institucioneve.

IX. IDENTIFIKIMI PROFESIONAL PERSONAL

Identifikimi i anëtarëve

Neni 43

Anëtari gjatë ushtrimit të veprimtarisë së tij profesionale, me qëllim të identifikimit dhe transparencës gjatë gjithë kohës mban kartën identifikuese të anëtarësisë së OIK apo të institucionit ku ushtron veprimtarinë profesionale shëndetësore

X. HULUMTIMET BIOMJEKËSORE

Kërkesa për Hulumtim

Neni 44

Anëtari, që merr përsipër një punë kërkimore, studiuë me qëllim hulumtues, parandalues, diagnostikues apo mjekues, ku përfshihen të sëmurë apo vullnetarë, detyrimisht paraqet projektin përpara një komisioni të posaçëm, kompetent e të pavarur, për të vlerësuar përgjigjen shkencore, pranueshmërinë etike dhe për ta miratuar.

Detyrime të përgjithshme për realizimin e hulumtimit

Neni 45

1. Anëtari që ndërmerr hulumtime në fushën e biomjekësisë duhet të jetë i arsimuar dhe i trajnuar në pikëpamje shkencore.
2. Anëtari, që kërkon leje për hulumtime me qëllim të përgatitjes së punimeve akademike duhet të dëshmoj lejen e autoritetit ku zhvillohet studimi.
3. OIK para shqyrtimit dhe miratimit të kërkesës do të siguroj lejet dhe konfirmimet e nevojshme nga institucionet relevante, shkencore, klinike dhe profesionale, në veçanti QKUK.
4. Në hulumtimet biomjekësore, anëtari duhet t'i përmbahet parimeve etike që rrjedhin nga Deklarata e Helsinkit dhe rishikimeve të saj; Praktika e Mirë Klinike; legjisllacioni në fuqi, si dhe në përputhje me protokollet e miratuara nga organi kompetent
5. Anëtari që kryen hulumtimin është i detyruar t'i njoftojë personat që janë përfshirë në projektin hulumtues në detaje për qëllimin e punës, përfitimet e pritshme dhe rreziqet e mundshme, dhe të marrë pëlqimin e tyre me shkrim. Nëse kjo nuk është e mundur për shkak të moshës së mitur, paafësisë ose gjendja e vetëdijes së personit, kërkohet pëlqimi nga përfaqësuesi ose kujdestari i tij / saj ligjor, në përputhje me legjisllacionin në fuqi.
6. Për kërkesat për hulumtime shkencore të natyrës klinike dhe mjekësore, OIK do të angazhoj ekupe të ekspertëve të cilët vlerësojnë implikimet e mundshme negative të komuniteti i cili është objekt studimi dhe hulumtimi.
7. Përshtatja, kryerja dhe nxitja e metodave të pavërtetuara shkencërisht që ngjallin shpresë të rrejshme të pacientët dhe familjarët e tyre, është i ndaluar dhe përbëjnë shkelje të rëndë të Kodit etik dhe deontologjisë të infermierëve.

XI. KATEGORIZIMI I SHKELJEVE

Klasifikimi i shkeljeve

Neni 46

1. Shkeljet e dispozitave të këtij kodi mund të klasifikohen:
 - a. Shkelje të Lehta dhe
 - b. Shkelje të Rënda.

Kriteret e klasifikimit

Neni 47

1. Klasifikimi i shkeljes në të lehtë apo të rëndë bëhet nga Këshilli Etik. Me rastin e klasifikimit të shkeljes, Këshilli Etik vendos me të paktën 4 vota.
2. Me rastin e klasifikimit Këshilli Etik merr për bazë:
 1. Shkallën e përgjegjësisë etike
 2. Motivet e shkeljes
 3. Dëmtimin e vlerës së mbrojtur

4. Rrethanat në të cilën është bërë shkelja
5. Sjelljen e mëparshme të shkelësit
6. Pranimin e fajit
7. Zotimi se i njëjti nuk do të përsërit shkeljen e njëjtë.

Shkeljet e rënda

Neni 48

Rastet e veprimit në kundërshtim me nenet 13, 14, 15, 16, 19, 20, 24, 27, 28, 30, 34, 35, 37, 41, 44, 45 si dhe përsëritja e shkeljes së lehtë brenda periudhës 12 mujore nga masa e shqiptuar, klasifikohen si shkelje të rënda dhe nuk mund të ndryshohen nga Këshilli Etik pavarësisht nga neni paraprak.

Tërheqja e përkohshme e licencës

Neni 49

1. Në rastet e shkeljeve të rënda sipas këtij kodit, Prokurori i Odës me rastin e fillimit të hetimeve mund ti propozon Këshillit Etik tërheqjen e përkohshme të licencës së anëtarit për periudhë jo më gjatë se 6 muaj.
2. Këshilli Etik vendos mbi kërkesën e këtij propozimi brenda 15 ditëve nga propozimi i Prokurorit të Odës.

Masat disiplinore

Neni 50

1. Këshilli Etik për shkeljet e lehta të Kodit Etik mund të shqiptoj këto masa:
 - a. Rekomandim kolegjial
 - b. Kërkim falje ndaj pacientit
 - c. Qortim ose qortim publik
 - Qortimi publik mund të ketë efekt jo më shumë se 1 vit nga plotfuqishmëria e tij
2. Nëse shkelësi nga paragrafi 1 nuk i bindet dhe nuk vepron përball masave, si dhe në shkeljet e rënda Këshilli Etik mund të shqiptojë masat disiplinore tjera të paraparë nga Ligji për Odat e profesionistëve shëndetësorë si:
 - a. Arsimim shtesë dhe të detyrueshëm pasuniversitar dhe trajnim;
 - b. Trajtim i detyrueshëm nga alkooli, droga dhe veset tjera;
 - c. Tërheqja e përkohshme në afat deri një (1) vjeçar;
 - d. Tërheqja e përhershme e licencës dhe/ose fshirja e profesionistit shëndetësor nga regjistri, e shoqëruar me vendim të gjykatës që ndërlidhen me ushtrimin e profesionit;
 - e. Dënimi me të holla njëmijë (1000) deri në tremijë (3000) Euro për çdo shkelje të ligjit, detyrave profesionale dhe etike.
- 2.1. Për shqiptimin e masave nga paragrafi 2, pika a dhe b Këshilli Etik paraprakisht siguron ekspertizë profesionale, dhe në vartësi të ekspertizës përcakton kohëzgjatjen e masës.
3. Shqiptimi i masave duhet të regjistrohen në sistemin elektronik të Odës.

XII. DISPOZITAT PËRFUNDIMTARE

Neni 51

1. Çdo sjellje joprofesionale në kundërshtim me dispozitat e këtij Kodi, përbën objekt për ndjekje dhe gjykim disiplinor profesional bazuar në Ligjin për Odat e Profesionistëve Shëndetësor Nr.04/L-150, Statutin e Odës, Kodin Etik dhe aktet e brendshme normative.
2. Oda është e detyruar të harmonizojë aktet e përgjithshme me dispozitat e këtij Kodi brenda 1 viti nga hyrja në fuqi e këtij Kodi.
3. Me hyrjen në fuqi të këtij Kodi, shfuqizohet kodi i miratuar në Kuvend me datë 12.06.2015 dhe çdo dispozitë nën status që është në kundërshtim me këtë kod.
4. Ky Kod hyn në fuqi tetë ditë pas miratimi të tij në Kuvendin e Odës.

Kryetare e OIK
Nexhmije Gori



Prishtinë, 2025

SHTOJCA 1

DEKLARATË NËN BETIM ME RASTIN E ANËTARËSIMIT

Përmes kësaj deklaratë, unë i/e nënshkruar/i/a më poshtë, duke qenë i vetëdijshëm mbi përmbajtjen dhe kërkesat etike të parapara me Kodin e Etikës dhe Deontologjisë së Odës së Infermierëve, mamive dhe profesionistëve shëndetësor, konfirmoj që gjatë ushtrimit të veprimtarisë time nuk kam shkelje etike të shqiptuara nga organet kompetente si dhe kam njohuri të plotë mbi kërkesat etike të tanishme për ushtrim të profesionit.

I/E vetëdijshëm/me që deklarata e rreme sipas Kodit Penal të Republikës së Kosovës, paraqet vepër penale, deklaroj me përgjegjësi të plotë morale dhe ligjore se të dhënat e paraqitura në këtë deklaratë janë të vërteta dhe të sakta, si dhe se në rastin e kundërt i marrë përsipër të gjitha pasojat e parapara me legjislacionin në fuqi.

Me anë të kësaj deklaratë autorizoj Odën e Infermierëve të Kosovës që në çdo kohë të mund të bëjë verifikimin e këtyre të dhënave të paraqitura në deklaratë, kurse konfirmimin eventual mund ta bëjë përmes kontakteve të paraqitura me rastin e deklaramit tim.

Emri dhe Mbiemri: _____

Institucioni/Punëdhënës (nëse është i/e punësuar): _____

Nr. personal i letërnjoftimit: _____

Nënshkrimi: _____

Datë: _____